



SAOPĆENJE ZA JAVNOST

Zbog krađe novca iz crkve Osuđen na deset mjeseci zatvora

Brčko, 26.7.2024. godine

Tužilaštvo Brčko distrikta BiH okončalo je postupak u predmetu protiv A. B. (26) iz Tuzle optuženog da je krajem aprila ove godine iz pravoslavnog hrama u brčanskom naselju Grčica oduzeo novac prikupljen u humanitarne svrhe. Za tešku krađu učinjenu u više navrata oduzimanjem i prisvajanjem novca u iznosu od 211,75 KM, on je danas pred Osnovnim sudom u Brčkom osuđen na deset mjeseci zatvora.

Tužilaštvo Distrikta procesuiralo je A. B. jer je 24. aprila, oko 10.45 sati, iz Hrama Prepodobne mati Paraskeve - Svete Petke, u ulici Prote Matije Nenadovića, oduzeo novčana sredstva prikupljana u humanitarne svrhe za dvoje djece. Kako se navodi u optužnici, pošto je ušao u unutrašnjost ovog vjerskog objekta, on je iz kase u kojoj su prikupljana sredstva, u više navrata oduzeo i prisvojio dio zatečenog novca u iznosu od 211,75 KM. On je tako za sebe pribavio protivpravnu imovinsku korist u navedenom iznosu, za koji iznos je oštetio ovaj hram, učinivši krivično djelo teške krađe na naročito drzak način. U bjekstvu su ga spriječili sveštenici Hrama, nakon čega je lišen slobode.

Intenzivno postupajući na rješavanju slučaja, Tužilaštvo je u saradnji s Policijom distrikta Brčko, brzo sprovelo istragu i 22. jula protiv njega podiglo optužnicu za krivično djelo Teška krađa (iz člana 281 stav (2) tačka 2) Krivičnog zakona Brčko distrikta BiH). Pošto je po potvrđivanju optužnice optuženi priznao krivicu, Osnovni sud distrikta Brčko održao je pretres za izricanje krivičnopravne sankcije na kojem mu je izrekao kaznu zatvora u trajanju od deset mjeseci. Treba imati na umu da se radi o licu koje je ranije višestruko osuđivano za imovinska i druga krivična djela. Između ostalog, on je prije dvije godine pred istim sudom osuđen za krivično djelo razbojništva na kaznu zatvora od jedne godine i jednog mjeseca, a zatim i na pet mjeseci zatvora za krađu. Posljedni put pravosnažno je osuđen u novembru 2022. g. na jedinstvenu kaznu zatvora od godinu i dva mjeseca, za krivična djela neovlaštene proizvodnje i stavljanja u promet opojnih droga, teške krađe i oštećenja tuđe stvari.

Priznanjem krivice optuženi se odrekao prava na suđenje, a potom i prava na žalbu na presudu. S druge strane, da li će se koristiti pravom na izjavljivanje žalbe Tužilaštvo će odlučiti po prijemu pisanog otpravka presude. Po izricanju presude, sud je optuženom posebnim rješenjem ukinuo pritvor koji mu je, usljed opasnosti od ponavljanja krivičnog djela, određen odmah pošto je i uhapšen. U obrazloženju ovog rješenja, sud je ocijenio da takvi razlozi dalje ne egzistiraju, naglasivši da pritvor ne može biti zamjena za kaznu zatvora, jer se tako ne bi ostvarila svrha kažnjavanja.

GLAVNI TUŽILAC

ZEKERIJA MUJKANović